

官常典

官常典第七十二卷

宗藩部列傳十六

南齊三 巴陵隱王寶義

按南齊書明七王傳明帝十一男敬皇后生東昏侯寶卷江夏王寶元鄱陽王寶寅和帝殷貴嬪生巴陵隱王寶義晉熙王寶嵩袁貴妃生廬陵王寶源管淑妃生邵陵王寶攸許淑媛生桂陽王寶貞餘早夭 按本傳巴陵隱王寶義字智勇明帝長子也本名明基建武元年爲持節都督揚南徐州軍事前將軍揚州刺史封晉安郡王三千戶寶義少有廢疾不堪出人間故止加除授仍以始安王遙光代之轉寶義爲右將軍領兵置佐鎮石頭二年出爲使持節都督南徐州軍事鎮北將軍南徐州刺史東昏卽位進征北大將軍開府儀同三司給仗永元元年給班劍二十人始安王遙光誅爲都督揚南徐二州軍事驃騎大將軍揚州刺史如故持節東府被兵火屋宇燒殘帝方營宮殿不暇修葺寶義鎮西州三年進位司徒和帝西臺建以爲侍中司空使持節都督刺史如故梁王定京邑宣德太后令以寶義爲太尉領司徒詔云不言之化形於自遠時人皆云此實錄也梁受禪封謝沐

縣公尋封巴陵郡王奉齊後天監中薨

江夏王寶元

按南齊書本傳寶元字智深明帝第三子也建武元年爲征虜將軍領石頭戍事封江夏郡王仍出爲持節都督郢司二州軍事西中郎將郢州刺史永泰元年還爲前將軍領石頭戍事未拜東昏卽位進號鎮軍將軍永元元年又進車騎將軍代晉安王寶義爲使持節都督南徐兖二州軍事南徐兖二州刺史將軍如故寶元娶尙書令徐孝嗣女爲妃孝嗣被誅離絕少帝送少姬二人與之寶元恨望密有異計明年崔慧景舉兵還至廣陵遣使奉寶元爲主寶元斬其使因是發將吏防城帝遣馬軍主戚平外監黃林夫助鎮京口慧景將渡江寶元密與相應殺司馬孔矜典籤呂承緒及平林夫開門納慧景使長史沈攸之諮議柳惔分部軍衆乘八摑輿手執絳麾幡隨慧景至京師住東城百姓多往投集慧景敗收得朝野投寶元及慧景軍名帝令燒之曰江夏尙爾豈復可罪餘人寶元逃奔數日乃出帝召入後堂以步鄣裹之令羣小數十人鳴鼓角馳繞其外遣人謂寶元曰汝近圍我亦如此少日乃殺之

廬陵王寶源

按南齊書本傳寶源字智淵明帝第五子也建武元年爲北中郎將鎮琅邪城封廬陵郡王遷右將軍領石頭戍事仍出爲使持節都督南兗兗徐青冀五州軍事後將軍南兗州刺史王敬則伏誅徙寶源爲都督會稽東陽臨海永嘉新安五郡軍事會稽太守將軍如故永元元年進號安東將軍和帝卽位以爲侍中車騎將軍開府儀同三司都督太守如故未拜中興二年薨

鄱陽王寶寅

按南齊書本傳寶寅字智亮明帝第六子也建武初封建安郡王二年爲北中郎將鎮琅邪城明年出爲持節都督江州軍事南中郎將江州刺史東昏卽位爲使持節都督郢司二州軍事征虜將軍郢州刺史尋進號前將軍永元二年徵爲撫軍領石頭戍事未拜三年爲車騎將軍開府儀同三司鎮石頭其秋雍州刺史張欣泰等謀起事於新亭殺臺內諸主帥難作之前南譙太守王靈秀奔往石頭率城內將吏見力去車腳載寶寅向臺城百姓數千人皆空手隨後京邑騷亂寶寅至杜姥宅日已欲暗城門閉城上人射之衆棄寶寅逃走寶寅逃亡三日戎服詣草市尉尉馳以啟帝帝迎

寶寅入宮問之寶寅涕泣稱爾日不知何人逼使上車仍將去制不自由帝笑乃復爵位和帝立西臺以寶寅爲使持節都督南徐兗二州軍事衛將軍南徐州刺史少帝以爲使持節都督荆益寧雍梁北南秦七州軍事荊州刺史將軍如故宣德太后臨朝梁王爲建安公改封寶寅爲鄱陽王中興二年謀反奔魏

按魏書蕭寶寅傳蕭寶寅字智亮蕭鸞第六子寶卷母弟也鸞之竊位封寶寅建安王寶卷立以爲車騎將軍開府領石頭戍軍事寶卷悖狂其直後劉靈運等謀奉寶寅密遣報寶寅寶寅許之遂迎寶寅率石頭文武向其臺城稱警蹕百姓隨從者數百人會日暮城門閉乃燒三尚及建業城城上射殺數人衆乃奔散寶寅棄車步走部尉執送之自列爲人所逼寶卷亦不罪責也寶卷弟寶融僭立以寶寅爲衛將軍南徐州刺史改封鄱陽王蕭衍旣克建業殺其兄弟將害寶寅以兵守之未至嚴急其家閤人顏文志與左右麻拱黃神密計穿牆夜出寶寅具小船於江岸脫本衣服著烏布襦腰繫千許錢潛赴江畔躡屨徒步脚無全皮防守者至明追之寶寅假爲釣者隨流上下十餘里追者不疑待散乃度西岸遂委命投華文榮文榮與其從子天龍惠連等三人棄家將寶寅遁匿山澗賃驢乘之晝伏宵行景明二年至壽春之東城戍戍主杜元倫推檢知寶蕭氏

子也以禮延待馳告揚州刺史任城王澄澄以車馬侍衛迎之時年十六徒步憔悴見者以爲掠賣生口也澄待以客禮乃請喪居斬衰之服澄遣人曉示情禮以喪兄之制給其齊衰寶寅從命澄率官寮赴弔寶寅居處有禮不飲酒食肉輟笑簡言一同極哀之節壽春多其故義皆受慰唁唯不見夏侯一族以夏侯同蕭衍故也改日造澄澄深器重之景明三年閏四月詔曰蕭寶寅深識機運歸誠有道冒嶮履屯投命絳闕微子陳韓亦曷以過也可遣羽林監領主書劉桃符詣彼迎接其資生所須之物及衣冠車馬在京邸館付尙書悉令預備及至京師世宗禮之甚重伏訴闕下請兵南伐雖遇暴風大雨終不暫移是年冬蕭衍江州刺史陳伯之與其長史褚冑等自壽春歸降請軍立効世宗以寶寅誠懇及伯之所陳時不可失四年二月乃引八座門下入議部分之方四月除使持節都督東揚南徐兗三州諸軍事鎮東將軍揚州刺史丹陽郡開國公齊王配兵一萬令且據東城待秋冬大舉寶寅明當拜命其夜慟哭至晨備禮策授賜車馬什物給虎賁五百人事從豐厚猶不及劉昶之優隆也又任其募天下壯勇得數千人以文智等三人爲積弩將軍文榮等三人爲彊弩將軍並爲軍主寶寅雖少羈流而志性雅重過葺猶絕酒肉慘形悴色蔬食粗衣未嘗嬉笑及被命當

南伐貴要多相憑託門庭賓客若市書記相尋寶寅接對報復不失其理正始元年三月寶寅行達汝陰東城已陷遂停壽春之柝賢寺值賊將姜慶真內侵士民響附圍逼壽春遂據外郭寶寅躬貫甲冑率下擊之自四更交戰至明日申時賊旅彌盛寶寅以衆寡無援退入金城又出相國東門率衆力戰始破走之當寶寅壽春之戰勇冠諸軍聞見者莫不壯之七月還京師改封梁郡開國公食邑八百戶及中山王英南伐寶寅又表求征乃爲使持節鎮東將軍別將以繼英配羽林虎賁五百人與英頻破衍軍乘勝遂攻鍾離淮水汎溢寶寅與英狼狽引退士卒死沒者十四五有司奏寶寅守東橋不固軍敗由之處以極法詔曰寶寅因難投誠宜加矜貸可恕死免官削爵還第尋尙南陽長公主賜帛一千匹并給禮具公主有婦德事寶寅盡蕭雍之禮雖好合積年而敬事不替寶寅每入室公主必立以待之相遇如賓自非太妃疾篤未曾歸休寶寅器性溫順自處以禮奉敬公主內外諧穆清河王懌親而重之永平四年盧昶克蕭衍朐山戍以琅邪戍主傅文驥守之衍遣師攻文驥盧昶督衆軍救之詔寶寅爲使持節假安南將軍別將長驅往赴受盧昶節度賜帛三百匹世宗於東堂餞之詔曰蕭衍送死連兵再離寒暑卿忠規內挺孝誠外亮必欲鞭尸吳墓戮衍江陰故授

卿以總統之任仗卿以克捷之規宜其勉歟寶寅對曰讎恥未復枕戈俟旦雖無甲包之志敢忘伍
胥之心今仰仗神謀俯屬將帥誓必拉彼姦勅以清王略聖澤下臨不勝悲荷因泣涕橫流哽咽良
久於後廬昶軍敗唯寶寅全師而歸延昌初除安東將軍瀛州刺史復其齊王四年遷撫軍將軍冀
州刺史及大乘賊起寶寅遣軍討之頻爲賊破臺軍至乃滅之靈太后臨朝還京師蕭衍遣其將康
絢於浮山堰淮以灌揚徐除寶寅使持節都督東討諸軍事鎮東將軍以討之尋復封梁郡開國公
寄食濟州之濮陽熙平初賊堰旣成淮水濫溢將爲揚徐之患寶寅於堰上流更鑿新渠引注淮澤
水乃小減乃遣輕車將軍劉智文虎威將軍劉延宗率壯士千餘夜渡淮燒其竹木營聚破賊三壘
殺獲數千人斬其直閭將軍王升明而還火數日不滅衍將垣孟孫張僧副等水軍三千渡淮北攻
統軍呂叵寶寅遣府司馬元達統軍魏續年等赴擊破之孟孫等奔退乃授左光祿大夫殿中尙書
寶寅又遣軍主周恭叔率壯士數百夜渡淮南焚賊徐州刺史張豹子等十一營賊衆驚擾自殺害
者甚衆寶寅還京師又除使持節散騎常侍都督荆關東洛三州諸軍事衛將軍荊州刺史不行復
爲殿中尙書寶寅之在淮堰蕭衍手書與寶寅曰謝齊建安王寶寅亡兄長沙宣武王昔投漢中值

北寇華陽地絕一隅內無素畜外絕繼援守危疏勒計踰田單卒能全土破敵以弱爲強使至之日君臣動色左右相賀齊明帝每念此功未嘗不輟箸咨嗟及至張永崔慧景事大將覆軍於外小將懷貳於內事危累卵勢過綴旒亡兄忠勇奮發旋師大覲重圍累日一鼓魚潰克定慧景功踰桓文亡弟衛尉兄弟勦力盡心內外大勳不報翻罹荼酷百口幽執禍害相尋朕於齊明帝外有龔敵之力內盡帷幄之誠日自三省曾無寸咎遠身邊外亦復不免遂遣劉山陽輕舟西上來見掩襲時危事迫勢不得已所以誓衆樊鄧會踰孟津本欲翦除梅蟲兒茹法珍等以雪冤酷拔濟親屬反身素里屬張穆王珍國已建大事寶暉子晉屢動危機迫樂推之心應上天之命事不獲已豈其始願所以自有天下絕棄房室斷除滋味正欲使四海見其本心耳勿謂今日之位是爲可重朕之視此曾不如一芥雖復噬臍之蹤難追汾陽之志何遠而今立此堰卿當未達本意朕於昆蟲猶不欲殺亦何急爭無用之地戰蒼生之命也正爲李繼伯在壽陽侵犯邊境歲月滋甚或攻小城小戍或掠一村一里若小相酬答終無寧日邊邑爭桑吳楚連禍所以每抑鎮戍不與校計繼伯旣得如此濫竊彌多今修此堰止欲以報繼伯侵盜之役旣非大舉所以不復文移北土卿幼有倜儻之心早懷縱

橫之氣往日卿於石頭舉事雖不克捷亦丈夫也今止河洛真其時矣雖然爲卿計者莫若行率此衆襲據彭城別當遣軍以相影援得捷之後便遣卿兒子屏侍送卿國廟并卿室家及諸姪從若方欲還北更設奇計恐機事一差難重複集勿爲韓信受困野雞寶寅表送其書陳其忿毒之意朝廷爲之報答寶寅志存雪復屢請居邊神龜中出爲都督徐南兗二州諸軍事車騎將軍徐州刺史乃起學館於清東朔望引見土姓子弟接以恩顏與論經義勤於政治吏民愛之凡在三州皆著名稱正光二年徵爲車騎大將軍尙書左僕射善於吏職甚有聲名四年上表曰臣聞堯典有黜陟之文周書有考績之法雖其源難得而尋然條流抑亦可知矣大較在於官人用才審於所蒞練迹校名驗於虛實豈不以臧否得之餘論優劣著於歷試者乎旣聲窮於月旦品定於黃紙用效於名輩事彰於臺閣則賞罰之途差有商準用捨之宜非無依據雖復勇進忘退之僞奔競於市里過分亡涯之請馳驚於多門猶且顧其聲第慎其與奪器分定於下爵位懸於上不可妄叨故也今竊見考功之典所懷未喻敢竭無隱試陳萬一何者竊惟文武之名在人之極地德行之稱爲生之最首忠貞之美立朝之譽仁義之號處身之端自非職惟九官任當四岳授曰爾諧讓稱兪往將何以克厭大

名允茲令問自比以來官罔高卑人無貴賤皆飾辭假說用相褻舉涇渭同波薰蕕共器求者不能量其多少與者不復覈其是非遂使冠履相貿名與實爽謂之考功事同汎涉紛紛漫漫焉可勝言又在京之官積年一考其中或所事之主遷移數四或所奉之君身亡廢絕或具寮離索或同事凋零雖當時文簿記其殿最日久月深駁落都盡人有去留誰復掌其勤惰或停休積稔或分隔數千累年之後方求追訪聲迹立其考第無不苟相悅附共爲脣齒飾垢掩疵妄加丹素趣令得階而已無所顧惜賢達君子未免斯患中庸已降夫復何論官以求成身以請立上下相蒙莫斯爲甚又勤恤人隱咸歸守令厥任非輕所責實重然及其考課悉以六載爲程旣而限滿代還復經六年而敘是則歲周十二始得一階於東西兩省文武閑職公府散佐無事冗官或數旬方應一直或朔望止於整朝及其考日更得四年爲限是則一紀之中便登三級彼以實勞劇任而遷貴之路至難此以散位虛名而升陟之方甚易何內外之相懸令厚薄之如是又聞之聖人大寶曰位何以守位曰仁孟子亦曰仁義忠信天爵也公卿大夫人爵也古之人修其天爵而人爵從之故雖文質異時污隆殊世莫不寶茲名器不以假人是以賞罰之柄恆自持也至乃周之藹藹五叔無官漢之察察館陶

徒請豈不重骨肉私親親誠以賞罰一差則無以懲勸至公暫替則覬覦相欺故至慎至惜殷勤若此況乎親非肺腑才乖秀逸或充單介之使始無汗馬之勞或說興利之規終慙十一之潤皆虛張無功妄指贏益坐獲數階之官藉成通顯之貴於是巧詐萌生僞辯鋒出役萬慮以求榮開百方而逐利握樞秉鈞者亦知其苦斯但抑之則其流已注引之則有何紀極夫琴瑟在於必和更張求其適調去者既不可追來者獨或宜改按周官太宰之職歲終則令官府各正所司受其會計聽其致事而詔於王三歲則大計羣吏之治而誅賞之愚謂今可粗依其準見居官者每歲終本曹皆明辨在官日月具覈才行能否審其實用而注其上下游辭宥說一無取焉列上尙書覆其合否如有紕謬卽正而罰之不得方復推詰委否容其進退既定其優劣善惡交分庸短下第黜凡以明法幹務忠清甄能以記賞總而奏之經奏之後考功曹別書於黃紙油帛一通則本曹尙書與令僕印署留於門下一通則以待中黃門印署掌在尙書嚴加緘密不得開視考績之日然後對共裁量如此則少存實錄薄止姦回其內外考格裁非庸管乞求博議以爲畫一若殊謀異策事關廢興遐邇所談物無異議者自可臨時斟酌匪拘恆例至如援流引比之訴貪榮求級之請如不限以關鍵肆其傍

通則蔓草難除涓流遂積穢我彝章撓茲大典謂宜明加禁斷以全至治開返本之路杜澆敝之門
如斯則吉士盈朝薪標載煥矣詔付外博議以爲永式竟無所定時蕭衍弟子西豐侯正德來降寶
寅表曰伏見揚州表蕭正德自云避禍遠投宸掖背父叛君駭議衆口深心指趣厥情難測臣聞立
身行道始於事親終於事君故君親盡之以恆敬嚴父兼之以博愛斯人倫之所先王教之盛典三
千之條莫大於不孝毀則藏姦常刑靡赦所以晉恭獲謗無所逃死衛伋受誣二子繼沒親命匪棄
國孰無父況今封豕尙存長蛇未滅偷生江表自安毒酖而正德居猶子之親竊通侯之貴父榮於
國子爵於家履霜弗聞去就先結隔絕山淮溫清永盡定省長違報復何日以此爲心心可知矣皇
朝綿基累葉恩均四海自北徂南要荒仰澤能言革化無思不遑賁玉帛於丘園標忠孝以納賞築
藁街於伊洛集華裔其歸心被髮鑿身之曾屈膝而請吏交趾文身之渠歟關而効質至如正德宜
甄義以致貶昔越栖會稽賴宰嚭以獲立漢困彭宋實丁公而獲免吳項已平二臣卽法豈不錄其
情哉欲明責以示後況遺君忽父狼子是心旣不親親安能親人中間變詐或有萬等伏惟陛下聖
敬自天欽光纂歷昭德塞違以臨羣后脫包此凶醜寘之列位百官是象其何誅焉臣釁結禍深痛

纏肝髓日暮途遙復報無日豈區區於一豎哉但才雖庸近職居獻替愚衷寸抱敢不申陳伏願聖
慈少垂察覽訪議槐棘論其是非使秋霜春露施之有在相鼠攸刺過死有歸無令申伋受笑於苟
存曾閔淪名於盛世正德既至京師朝廷待之尤薄歲餘還叛五年蕭衍遣其將裴邃虞鴻等率衆
寇揚州詔寶寅爲使持節散騎常侍車騎大將軍都督徐州東道諸軍事率諸將討之既而揚州刺
史長孫稚大破邃軍斬鴻賊遂奔退初秦州城人薛珍劉慶杜遷等反執刺史李彥推莫折大提爲
首自稱秦王大提尋死其第四子念生竊號天子改年曰天建置立官僚以息阿胡爲太子其兄阿
倪爲西河王弟天生爲高陽王伯珍爲東郡王安保爲平陽王遣天生率衆出隴東攻沒汧城仍陷
岐州執元志裴芬之等遂寇雍州屯於黑水朝廷甚憂之乃除寶寅開府西道行臺率所部東行將
統爲大都督西征肅宗幸明堂因以餞之寶寅與大都督崔延伯擊天生大破之斬獲十餘萬追奔
至於小隴軍人採掠遂致稽留不速追討隴路復塞仍進討高平賊帥万俟醜奴於安定更有負捷
時有天水人呂伯度兄弟始共念生同逆後與兄衆保於顯親聚衆討念生戰敗降於胡琛琛以伯
度爲大都督秦王資其士馬還征秦州大敗念生將杜粲於成紀又破其金城王吳折普賢於永洛

城遂至顯親念生率衆身自拒戰又大奔敗伯度乃背胡琛襲琛將劉拔破走之遣其兄子忻和率騎東引國軍念生事迫乃詐降於寶寅朝廷喜伯度立義之功授撫軍將軍涇州刺史平秦郡開國公食邑三千戶而大都督元修義高聿停軍隴口久不西進念生復反伯度終爲醜奴所殺故賊勢更甚寶寅不能制孝昌二年四月除寶寅侍中驃騎大將軍儀同三司假大將軍尙書令給後部鼓吹增封千戶寶寅初自黑水終至平涼與賊相對數年攻擊賊亦憚之關中保全寶寅之力矣三年正月除司空公出師旣久兵將疲敝是月大敗還雍州仍停長安收聚離散有司處寶寅死罪詔恕爲民四月除使持節都督雍涇岐南豳四州諸軍事征西將軍雍州刺史假車騎大將軍開府西討大都督自關以西皆受節度九月念生爲其常山王杜粲所殺合門皆盡粲據州請降於寶寅十月除散騎常侍車騎將軍尙書令復其舊封是時山東關西寇賊充斥王師屢北人情沮喪寶寅自以出軍累年糜費尤廣一旦覆敗慮見猜責內不自安朝廷頗亦疑阻乃遣御史中尉酈道元爲關中大使寶寅謂密欲取己彌以憂懼而長安輕薄之徒因相說動道元行達陰盤驛寶寅密遣其將郭子恢等攻而殺之詐收道元尸表言白賊所害又殺都督南平王仲冏是月遂反僭舉大號赦其部

內稱隆緒元年立百官乃遣郭子恢東寇潼關行臺張始榮圍華州刺史崔襲詔尙書僕射行臺長孫稚討之時北地人毛鴻賓與其兄遐糾率鄉義將討寶寅寶寅遣其大將軍盧祖遷等擊遐爲遐所殺又遣其將侯終德往攻遐會子恢爲官軍所敗長孫稚又遣子子彥破始榮於華州終德因此勢挫還圖寶寅軍至白門寶寅始覺與終德交戰戰敗攜公主及其少子與部下百餘騎從後門出走渡渭橋投於寧夷巴張宕昌劉興周舍尋奔醜奴醜奴以寶寅爲太傅永安三年都督尒朱天光遣賀拔岳等破醜奴於安定追擒醜奴寶寅並送京師詔置閭門外都街之中京師士女聚共觀視凡經三日吏部尙書李神儻黃門侍郎高道穆並與寶寅素舊二人相與左右言於莊帝云其逆迹事在前朝冀得赦免會應詔王道習時自外至莊帝問道習在外所聞道習曰唯聞陛下欲不殺蕭寶寅帝問其故道習曰人云李尙書高黃門與寶寅周歛並居得言之地必能全之道習因曰若謂寶寅逆在前朝便將恕之寶寅敗於長安走爲醜奴太傅豈非陛下御曆之日賊臣不翦法欲安施帝然其言乃於太僕馳牛署賜死寶寅之將死神儻攜酒就之以敘舊故因對之下泣而寶寅夷然自持了不憂懼唯稱推天委命恨不終臣節而已公主攜男女就寶寅訣別慟哭極哀寶寅死色

貌不改寶寅有三子皆公主所生而並凡劣長子烈復尙肅宗妹建德公主拜駙馬都尉寶寅反伏法次子權與少子凱射戲凱矢激中之而死凱仕至司徒左長史凱妻長孫稚女也輕薄無禮公主數加罪責凱竊銜恨妻復惑說之天平中凱遂遣奴害公主乃輟凱於東市妻梟首家遂殄滅

按魏書明

帝諸子傳及南史本傳俱作寶寅餘作寅今改書一作寅

邵陵王寶攸

按南齊書本傳寶攸字智宣明帝第九子也建武元年封南平郡王二年改封三年爲北中郎將鎮琅邪城永元元年爲持節都督南北徐南兗青冀五州軍事南兗州刺史郎將如故未拜遷征虜將軍領石頭戍事丹陽尹戍事如故陳顯達事平出爲持節督江州軍事左將軍江州刺史以本號還京師授中將軍祕書監中興二年謀反宣德太后令賜死

晉熙王寶嵩

按南齊書本傳寶嵩字智靖明帝第十子也永元二年爲冠軍將軍丹陽尹仍遷持節都督南徐兗二州軍事南徐州刺史將軍如故中興元年和帝以爲中書令明年謀反伏誅